

Na osnovu člana 23. stav 1. tačka 15. i člana 70. stav 1. tačka 2. Statuta Općine Vogošća («Službene novine Kantona Sarajevo», broj: 27/14 – Prečišćeni tekst i 14/15) i člana 112. Poslovnika Općinskog vijeća Vogošća («Službene novine Kantona Sarajevo», broj: 27/14 – Prečišćeni tekst , 18/15, 45/15, 10/16 i 51/18), Općinsko vijeće Vogošća na sjednici održanoj 27.02.2020. godine , donijelo je sljedeći

ZAKLJUČAK

1. **Nacrt Pravilnika o kriterijima i postupku za određivanje naziva ulica, trgova, parkova, mostova, institucija i ustanova na području općine Vogošća** upućuje se na javnu raspravu.
2. Javna raprava će trajati 30 dana.
3. Učesnici u javnoj raspravi su mjesne zajednice na području općine Vogošća, političke partije, klubovi vijećnika , vijećnici i udruženja.
4. Prijedlozi, primjedbe, mišljenja i sugestije dostavljaju se u pismenoj formi Stručnoj Službi za poslove Općinskog vijeća i Općinskog načelnika koja organizuje i provodi javnu raspravu.
5. Komisija za odlikovanja i priznanja će nakon provedene javne rasprave podnijeti Općinskom vijeću Vogošća Izvještaj o provedenoj javnoj raspravi i predložiti usvajanje Pravilnika.

Broj: 01-04-323/20
Vogošća, 27.02.2020. godine



Na osnovu člana 23. stav 1. tačka 15. i člana 70. stav 1. tačka 2. Statuta Općine Vogošća ("Službene novine Kantona Sarajevo" broj:27/14 – Prečišćeni tekst i 14/15), Općinsko vijeće Vogošća na sjednici održanoj 27.02.2020. godine, utvrdilo je **NACRT**

P R A V I L N I K A
o kriterijima i postupku za određivanje naziva ulica, trgova, parkova, mostova,
institucija
i ustanova na području općine Vogošća

Član 1.

Ovim Pravilnikom utvrđuju se kriteriji i postupak za određivanje naziva ulica, trgova, parkova, mostova, institucija i ustanova na području Općine Vogošća.

Član 2.

Inicijativu za davanje ili izmjenu naziva iz člana 1. ovog Pravilnika, mogu podnijeti:

- Općinski načelnik
- Vijećnici Općinskog vijeća
- Savjeti mjesnih zajednica
- Organizacije civilnog društva
- Ustanove i druge pravne osobe

Član 3.

Inicijativa se podnosi Komisiji za odlikovanja i priznanja Općinskog vijeća Vogošća.

Član 4.

Inicijativa se podnosi u pisanoj formi sa obrazloženjem koje mora sadržavati osnovne podatke o predloženom nazivu, kao i opredjeljujuće podatke kod predlaganja naziva (toponima, historiskog datuma i slično).

Kad se inicijativa odnosi na ime neke osobe, ista mora sadržavati osnovne biografske podatke i podatke koji se odnose na doprinos navedene osobe općini Vogošća ili Bosni i Hercegovini.

Član 5.

Inicijative iz predhodnog člana obavezno moraju sadržavati tekstualni opis s osnovnim podacima o lokaciji, graničnim tačkama, izgledu ulice, trga, mosta ili parka, odnosno podatke o ustanovi ili instituciji kao i razloge zbog kojih se predlaže taj naziv.

Na zahtjev Komisije, podnosilac prijedloga je dužan dostaviti i dodatnu dokumentaciju i upotpuniti obrazloženje.

Član 6.

Prilikom razmatranja prijedloga Komisija ocjenjuje kvalitet predloženog naziva i njegovu sadržajnost.

Kvalitet predloženog naziva prilikom predlaganja imena osobe ogleda se u liku i djelu te osobe, njenom neposrednom i posrednom uticaju na prošlost, sadašnjost i budućnost stanovnika općine Vogošća ili Bosne i Hercegovine.

Sadržajnost prijedloga ogleda se u uvažavanju zastupljenosti naziva kako iz starije tako i novije historije Vogošće i Bosne i Hercegovine i potrebe očuvanja bitnih vrijednosti demokratskog društva.

Član 7.

Prilikom utvrđivanja prijedloga za određivanje naziva Komisija se rukovodi slijedećim načelima:

- uvažavanje izvornih rješenja odnosno pravih imena ulica, trgova, mostova i parkova iz vremena kad su izgrađeni, kao i naziva koji su tokom historije postali dio svijesti i tradicije građana;
- da se nepotrebno više puta ne mijenja ime ulice odnosno trga;
- uvažavanje potrebe grupisanja imena ulica i trgova radi kvalitetnije orijentacije.

Član 8.

Kriteriji za davanje naziva prvenstveno se određuju po prioritetima kako slijedi:

- imenima šehida i poginulih boraca iz odbrambeno-oslobodilačkog rata 1992.-1995. godina (dobitnici najvećih ratnih priznanja),
- slavni komadanti jedinica te drugi istaknuti pojedinci u organizovanju odbrane i odbrani Vogošće ili Bosne i Hercegovine), kao i imenima proslavljenih jedinica iz sastava OS R BiH;
- datumima vezanim za značajne događaje iz historije Vogošće ili Bosne i Hercegovine;
- imenima osoba koje su dale značajan doprinos u historiji Vogošće ili Bosne i Hercegovine;
- imenima osoba koje su dale izuzetno značajan doprinos u kulturnom, privrednom, društvenom, sportskom i naučnom razvoju općine Vogošća ili Bosne i Hercegovine.
- geografskim pojmovima (gradu, rijeci, toponima i sl.);

Član 9.

Komisija u proceduri razmatranja inicijative obavezno pribavlja mišljenja :

- Organa uprave za komunalne poslove Općine Vogošća;
- Savjeta MZ (ukoliko isti nije podnosilac inicijative) sa područja gdje je potrebno odrediti ili promijeniti naziv;
- Udruženja boraca čija su sjedišta na području općine Vogošća (ukoliko se radi o davanju imena u skladu sa kriterijima iz člana 8. alineja 1. i 2. Pravilnika);
- Saglasnost porodice.

Član 10.

Ukoliko se radi o promijeni postojećeg naziva ulice ili djela ulice, predlagač je dužan pribaviti mišljenje građana koji imaju prebivalište na području ulice.

Mišljenje građana će se pribaviti provođenjem ankete koja će obuhvatiti više od 50 % građana predmetne ulice sa potpisima i brojem lične karte za primjenu naziva ulice ili dijela ulice.

Član 11.

Nazivi se ne mogu odrediti po imenima živih osoba.

Član 12.

Komisija utvrđuje prijedlog zaključka kojim daje mišljenje da li su ispunjeni uslovi za davanje ili izmjenu naziva iz člana 1. ovog Pravilnika i isti dostavlja Općinskom vijeću na razmatranje i utvrđivanje konačnog mišljenja.

Zaključak o usvajanju inicijative dostavlja se Skupštini Kantona Sarajevo na dalju nadležnost.

Član 13.

Ovaj Pravilnik stupa na snagu osmog dana od objavljivanja u "Službenim novinama Kantona Sarajevo".

Broj:01-02-323/20
Vogošća,27.02.2020. godine

